

importat Barbarorum infida societas. Habet itaque animam suam in manibus suis, offerens illam Deo per manum cælestis clauicularij, & vestram. Excipite, si placet, hostiam sanctam, Deo placentem, rationabile obsequium, & beatissimi Apostolatus vestri autoritate exponite ouem lupis, si forte beata conuersatione non lupus comedat agnum, sed agnus conuertat lupum. Quodlibet autem horum fiat, Deus glorificabitur, ministerium vestrum honorificabitur, & anima fratris nullum detrimentum patietur. Præsumo enim a præteritis, quæ in eo enutriui, & multis didici argumentis, quod in commisso fidelis erit, & à tramite fidei nullo incursu exorbitabit, potiusque dabit sanguinem, quam imminuat fidem. Ait Apostolus: *Spiritum nolite extinguere*, & lucernam iam in modio accensam amplioribus suffusoriis accende: quia hæc est gloria & corona vestra, si granum frumenti per manum vestram in terram cadens multum fructum attulerit.

44.

1162 — 1178.

Samme Abbot PETERS ytterligare skrifvelse till Påfven i samma ämne.

K. h. 2: 587. n:o 95.

*Domino & patri Alexandro summo Pontifici, Petrus Abbas sancti Remigij quicquid filius patri.*

Nvllis bona voluntas a Sancto Spiritu incitata coercenda est habenis, nullis a proposito retardanda dissimulationibus. Sic enim iam totius nostræ Christianitatis religio intepuit, vt vix in toto grege Christiani populi aliqui inueniantur, qui non malint sub sicu & oliua terreni honoris & delectationis delitescere, quam procul odorare bellum, & audacter occurrere in occursum cum filiis Beniamin, & dimidia tribu Manasse, expediti armatis inimicis Christi. Ad vos itaque, Pater sanctissime, qui estis in corpore Ecclesiæ caput, de quo oleum non deficit, & qui Australæ sufflatorum habetis, respicit desides excitare, excitatos vero ad meliora & viciniora saluti iuuare & impellere. Nunquam ergo vobis molestum debet esse, quod a vobis postulatur in auxilio propagandæ Catholicæ fidei: quia & Dei & Domini nostri Iesu Christi laus inde augmentatur, meritum vestrum cumulatur, salus infideli populo acquiritur. Proinde petitiones pauperis illius Episcopi Fulconis, qui hoc anno curiam visitauit, & modo nobiscum hospitatur, apud vestram sanetitatem commendamus, scientes & pensantes, quia vbi nulla aut rara fidei supellectilia sunt, suffragio copioso indigetur. Indulgendum est ergo illi in multis, qui omnibus indiget. Sic magister & Dominus ve-

*Sv. Dipl.*

9

ster, cum discipulos suos mitteret vt noua prædicarent, addidit eis vt mira quoque facerent. Non a vobis hoc exigitur, vt virtus miraculorum tribuat, sed auctoritas vestra cum ipso & in ipso operans, vt facilius ei ab incredulis credatur. Nam & Moyses cum a Domino ad filios Israël mitteretur, signum rogauit dari, in quo sibi crederetur. Priuilegia ergo, quæ a vobis petit, & pro virga Moysi, & pro miraculis discipulorum Christi suffragabuntur ei. Nemo enim Deo faciente contemnet auctoritatem vestram, vel personam illius vestra auctoritate munitam. Valeat sanctitas vestra, cui débeo quicquid sum & possum. A multis enim audio, & in multis experior magnificientissimam gratiam vestram.

45.

1162 — 1178.

Abbot Peters i Remi förord för Biskop Folke hos Ärke-Bisk. Eskil.

K. h. 2: 589. n:o 104.

*E. Lundensi Archiepiscopo.*

Æternas & antiquas venas misericordiarum & benedictionum suarum profusa in omni largitate diuina gratia his temporibus, licet caritas multorum refrigescat, nondum exclusit. Quamuis enim reconditos & labentes sinus gratiæ in mentibus multorum fidelium Deus in Ecclesia sua adhuc retineat: vos præcipue tanquam lucernam super candelabrum positam, oleo multiplici perfudit, vnde multæ areolæ Ecclesiarum, Episcoporum, pauperum, viduarum, tam suauiter quam abundanter irrigantur. A multis siquidem retro temporibus, non in vacuum siue gratiam, siue pecuniam Dei exceperitis, ligando illam in sudario, vel infra domesticos parietes recludendo. Quis enim ad vos accèdens vestram non sènsit benedictionem? quis quantumlibet tepens, audiens vel videns conuersationem vestram, manum egenis expositam, ostium viatoribus patens, iudicium & iustitiam æqua lance, causam non personam discernens, omnemque reliquam actionum & sermonum vestrorum regionem perlustrans, non calefactus, non melioratus, non bene instructus abiit? Deo gratias, qui iuxta consuetudinem suam gratiam pro gratia superabundare facit in vobis, vt melior sit finis orationis quam principium, & vt exitus matutini & vespere delectabiles fiant. Adhuc enim stlicant manus vestræ aromata Dei, quæ de thuribulis sanctorum, per manus Angelorum, in incensum suavitatis naribus sedentis super thronum gratiæ referantur: quatinus in æterna tabernacula vos recipient, qui de bonitate & beneficiis vestris in terris sustentati, per gratiarum actionem in celo iam sunt recepti, vel adhuc recipiendi. Pauper iste Episcopus dominus Fulco,